



2022-imi akileraarutitigut ilanngaatisat il.il. imatut angissusilerneqarnissaannik Inatsisartut aalajangiiffigisassaattut siunnersuut:

- 1. Inummut ilanngaat.....kr. 48.000 (ukiumut)**
- 2. Ilangaat aalajangersimasoq.....kr. 10.000 (ukiumut)**
- 3. Aningaasarsiat B-t akileraaruteqaataasussaangitsut kr. 5.000 (ukiumut)**
- 4. Killilimmik akileraartussaataasut ilanngaataat.....kr. 1.000 (ukiumut)**
- 5. Kommunitut ataatsimut akileraarut.....6%**
(Aningaasaqarnermut Nunamullu imminermut Naalakkersuisoq)
(Siullermeerneqarnera)

Naalakkersuisut akileraarutitigut aqqissusseqqiiniarnerat, Demokraatit iluarisimaarpaat. Naalakkersuisulli tassunga pilersaarutaasa erseqqissartinnissaat, periarfissaqarsimangilaq. Taamaattumik arlaannattaluunniit iluamik ilisimangilaa, qanoq naatsorsuuteqassanersugut.

Demokraatinut akileraarutitigut aqqissusseqqiiniarnermut suleriesissaq ajornaatsuuvoq; najugaqarneq, inuuniarneq, suliffeqarfimmillu ingerlatsinerit akikinnerulissasut.

Imatullu isumaqarpugut:

1. Neqit, kaffiit tiillu eqqunneqarneranni akitsuut peerusupparput. Taakku kikkunnit tamanit atorneqarput taamaattumillu innuttaasut isertitaannut qaffaanissamut qulakkeerinnissallutik.
2. Isertitanit akileraarut apparusupparput aamma/imaluunniit sulinermut ilanngaat qaffallugu. Taakku tamarmik qulakkiissavaat, innuttaasut, namminneerlutik sulinerikkut isertitaminnik, annertunermik tigumminninnissaat.
3. Ingerlatsiviit isertitaminnit akileraarutaat 20 procentimik apparusupparput, suliffeqarfiit taamaasillutik periarfissaqalissammata annertusaanissamut aningaasaliinissaminnut taamaasillutillu suliffissanik amerlisaallutik.

Akileraarutitigut aqqissusseqqiiniarnermut isumaqatiginninniarnissanut qaaqquneqarnissarput qilanaaraarput, naatsorsuutigalugulu, Naalakkersuisut naalakkersuisooqatigiillu ersarissuliornerunissaat, aqqissusseqqiiniarneq taamaattoq qanoq takorloornerlugu.

Akileraarutitigut ilanngaatit siunnersuutigineqartut uani siunnersuummi eqqarsaatigalugit, erseqqissaatigissavarput, inummut ilanngaat 48.000 koruuninik annertussusilik 2005-imili allangortinneqarnikuunngimmat. Taassuma kinguneraa, aningaasat naleerukkiartornerata taassuma naliga annikillissimmamagu, aammalu innuttaasut isertitaasa taassuma kingunerisaanik annertuumik appariarsimanerinek. Sermitsiaq.AG-mi ulloq 29. Maj 2020 allaaserisami erserpoq, inummut ilanngaat 2020-



mi 61.800 koruuniusussaagaluartoq, piffissami 2005-2020¹ akit akissarsiallu nikerarnerat malissimasuuppasuk.

Tamanna equngassut uuma siunnersuutip suliarinerani aaqqinneqassanersoq eqqarsaatigisariaqaralarparput, tamannalu kajumissaarutigissavarput, Aningaasaqarnermut-akileraartarnermullu ataatsimiititaliap suliarinerani eqqarsaatigissagaa.

Taamatut oqaaseqarluta siunnersuut Aningaasaqarnermut- akileraartarnermullu ataatsimiititaliamut aappasaaniigassatut ingerlateqqipparput.

¹ <https://sermitsiaq.ag/node/221914>